Et pou couminchî, dins l'payis di nos mésse Jésus : Palestine, Israël... Li preumî miniss (Binjamin Nettanyaou) a sakant miséres sun les cwanes, mins on direut tt d'min.me qu'en' pètit'lumière di paix r'vént au djoû.

C'est putète comme el'mystère di môrt èt di résurrection di nos mésse Jésus. I nos faut sout'nu c'pètit lumignon-là, èyèt li repèter à nos chefs, èt à tout l'monde. I gna en'sakwè d'bon qui pourreut arriver : poussons du bon costè!

l' n'faut nén nos leyi daller à vîre toudis les mwès costès : oyi, mins, is vont co taper

des cayaux, et les autes vont co satchî des côps d'fusiques ..

Oyi, mins: ça, c'est bén wallon! on connaît l'tchanson:

vos avès des bias pourias dins vos djardén, disti Djoseph

- oyi mins, i gnarâ bén seûr des viers didins, respond Léon

qu'i fét bon, n'dont, dist'el Lalie

oyi, mins vos virèz qu'i va co ploure dimwin, respond Zabel

Nonna! i gna in p'tit pas qui s'pout fér dins ç'payis là : poussons à l'fér crèch', èt dijons'l' à tertous, et d'mandons à Sint Élwè di satchî en' miette su'l tchaine pou qu'ça avance!

I nos faut vîre preumî li bon costè, et poussî nos mésses à nos autes à wètî d'près pou

qu'el djustice avance, et qu'les moudreux fuchîchent èspétchîs di mau fér!

Sint Élwè, vos qu'a stî « pacifier » les bretons, dijeut in mot au Bon Djeu pou ces djinslà, nos vos l'dimandons !

I gna co d'lespwèr du costè di nos **vyie Europe**: elle avance, elle si bâtit avou bén des pwènes, mins tout d'minme, elle avance.

Si on leye tout fér, on vîra en'Europe qui n's'ra qu'en' affère di liârds, eyus qui les étasseus di liârds s'ront co pus ritches, et eyus qui les pauves s'ront co en'miette pus pauves.

Mins y gna des céns qui s'batt'nu pou en'Europe sociâle, eyus qui l'homme s'ra l'preumère ritchesse, et eyus ç'qui fr'a bon vikî pou tertous. I nos faut vîre çoula, intind çoulà, èt l'sout'nu; èyèt dîre à nos djins qui vont à l'Europe: ç'est ça qui nos v'lons, nos autes; à cause di nos fwè en Jésus, qu'asteut homme èyet Djeu: tout çu qu'arrive aux hommes est div'nu s'n'affère à li ètou; nos pinsons comme çoula ètou à cause des excimpes di nos tayons, et en preumî, di nos bon sint Élwè.

En boutant pou fér crèch' l'idée di EURELOY (Europe - Eloy), nos discipes di Djumet font en'sakwè di bon èt d'jusse. Nos pryières d'aud'joûrrd'hu pourront l'z'èdî à fér avancî en' Europe comme l'aureut voulut Sint Élwè.

À ç't'eûre, fèyons èchène çu qui nos mésse Jésus nos a dit d'fér en souv'nance di li : prind' el pwin comme in signe di toute nos vikérie, fér les paurts en l'brijant à boukets, èt r'connèche qui c'est li qu'est'avou nos autes, paski il a donné s'vyie pou qu'nos fuchîche escapés.

En drouvant nos mwins, nos drouvons ètou nos coeûrs, et nos s'ront en' miette pus capâbe di fér crèche l'espwèr di paix dins nos monde...

Abbé Robert Mathelart décédé le 11 décembre 2019